

Mick Antoniw AS

Y Cwnsler Cyffredinol a Gweinidog y Cyfansoddiad

22 Medi 2023

Annwyl Mick,

**Bil Cyfraith yr UE a Ddargedwir (Dirymu a Diwygio) 2023**

Diolch am eich llythyr ar 12 Medi 2023 a gafodd ei drafod yn ein cyfarfod ar 18 Medi 2023. Rydym yn croesawu eich ymatebion i'r cwestiynau a ofynnwyd yn ein llythyr ar 14 Gorffennaf.

Yn ystod yr wythnosau diwethaf, rydym wedi trafod gohebiaeth gan Weinidogion eraill Cymru sy'n ymwneud â *Deddf Cyfraith yr UE a Ddargedwir (Dirymu a Diwygio) 2023*. Er ein bod wedi ysgrifennu at y Gweinidogion hynny gyda rhai cwestiynau penodol, mae materion y byddem yn croesawu eich barn amdanynt. Yn ogystal, hoffem fynd ar drywydd nifer o faterion a godwyd yn eich llythyr diweddaraf atom.

Fel y cyfryw, byddwn yn ddiolchgar pe gallech ddarparu ymateb i'n cwestiynau eraill, sydd wedi'u cynnwys yn yr atodiad i'r llythyr hwn, erbyn 12 Hydref 2023.

Yn gywir,

*Huw Irranca-Davies*

Huw Irranca-Davies

Cadeirydd



## Atodiad

1. Yn eich llythyr, rydych yn datgan bod Nusrat Ghani AS, y Gweinidog Gwladol dros Ddiwydiant a Diogelwch Economaidd, wedi ysgrifennu atoch ar 2 Awst yn gofyn am gydsyniad Gweinidogion Cymru i reoliadau a fyddai'n dileu "nifer fechan o offerynnau yn yr Atodlen [i Ddeddf Cyfraith yr UE a Ddargedwir (Dirymu a Diwygio) 2023] y dylid eu cadw gan eu bod yn dal i gael eu defnyddio". Rydym hefyd wedi cael gohebiaeth gan y Gweinidog Newid Hinsawdd a'r Gweinidog Materion Gwledig a Gogledd Cymru a'r Trefnydd lle y maent wedi ein hysbysu eu bod hwythau wedi cydsynio i Weinidogion y DU wneud rheoliadau gan ddefnyddio pwerau yn Neddf Cyfraith yr UE a Ddargedwir (Dirymu a Diwygio) 2023. Gwyddoch nad yw Deddf Cyfraith yr UE a Ddargedwir (Dirymu a Diwygio) 2023 yn cynnwys darpariaeth sy'n gwneud cydsyniad Gweinidogion Cymru yn ofynnol cyn i Weinidog y DU arfer pŵer dirprwyedig mewn maes datganoledig o dan y Ddeddf honno. Yn eich llythyr, rydych yn datgan nad yw'r mater ynghylch 'mecanwaith cydsyniad amgen amgen' wedi'i ddatrys yn llawn eto. O ystyried yr ohebiaeth rydym yn cyfeirio ati uchod, byddwn yn ddiolchgar pe baech yn gwneud y canlynol:
  - i. cadarnhau'r broses gydsynio y cytunwyd arni rhwng Llywodraeth y DU a'r Llywodraethau Datganoledig a darparu manylion amdani,
  - ii. cadarnhau bod y broses gydsynio yn "diogelu ac yn parchu'r setliad datganoli",
  - iii. darparu copi o'r cytundeb rhynglywodraethol perthnasol i bwyllgorau'r Senedd.
2. Yn eich llythyr, rydych yn datgan bod gwaith trawslywodraethol i adolygu Atodlen 1 i Ddeddf Cyfraith yr UE a Ddargedwir (Dirymu a Diwygio) 2023 wedi parhau. Fel y soniwyd yng nghwestiwn 1, rydych yn datgan bod y Gweinidog Gwladol dros Ddiwydiant a Diogelwch Economaidd wedi ysgrifennu atoch ar 2 Awst yn gofyn am gydsyniad Gweinidogion Cymru i reoliadau a fyddai'n dileu nifer fechan o offerynnau o Atodlen 1 i Ddeddf Cyfraith yr UE a Ddargedwir (Dirymu a Diwygio) 2023 oherwydd bod yr Awdurdod Gweithredol lechyd a Diogelwch wedi nodi'r offerynnau hyn fel "sail gyfreithiol ar gyfer defnyddio [cynhyrchion bioleiddiadol sy'n cynnwys copr] yn ddiogel". Rydych yn cadarnhau bod swyddogion Llywodraeth Cymru wedi adolygu ymhellach y darpariaethau a nodwyd gan yr Awdurdod Gweithredol lechyd a Diogelwch ac yn cytuno y dylid eu cadw. Mae nodi'r darpariaethau hyn yn fater i'w groesawu, ond yn un difrifol. Mewn llythyr at y Pwyllgor Newid Hinsawdd, yr Amgylchedd a Seilwaith, dywedodd y Gweinidog Newid Hinsawdd fod ei hadran wedi "asesu'r Atodlen drwy *adolygiad polisi llai manwl*". [Ychwanegwyd y pwyslais]. Pa gyngor a chanllawiau a ddarparwyd i adrannau unigol yn Llywodraeth Cymru am y gwaith y mae'n rhaid iddynt ei wneud i sicrhau eu bod yn



hyderus nad oes angen cyfraith yr UE a ddargedwir a restrir yn yr Atodlen i Ddeddf Cyfraith yr UE a Ddargedwir (Dirymu a Diwygio) 2023 mwyach?

3. Credwn mai'r rheoliadau sy'n destun y llythyr gan y Gweinidog Gwladol dros Ddiwydiant a Diogelwch Economaidd yw Rheoliadau Deddf Cyfraith yr UE a Ddargedwir (Dirymu a Diwygio) 2023 (Dirymu a Datgymhwyso Darpariaeth Fachlud) 2023. Yn ogystal â'r offeryn hwn yn atal dirymu offerynnau y mae rhagor o ddadansoddiad wedi nodi na ddylent fod wedi'u cynnwys yn Atodlen dirymu Deddf Cyfraith yr UE a Ddargedwir (Dirymu a Diwygio) 2023, bydd y Rheoliadau hyn yn dirymu 93 darn o Ddeddf Cyfraith yr UE a Ddargedwir (Dirymu a Diwygio) 2023, gan ddefnyddio'r pŵer a roddir yn adran 14(1) o Ddeddf Cyfraith yr UE a Ddargedwir (Dirymu a Diwygio) 2023 i ddirymu darnau o ddeddfwriaeth sy'n ddiangen, wedi'u disodli neu nad ydynt yn cael effaith gyfreithiol yn y DU mwyach ar ôl i ni ymadael â'r UE. Mae Memorandwm Esboniadol drafft Llywodraeth y DU yn datgan yr ymgysylltwyd â'r gweinyddiaethau datganoledig ar ddiben a chynnwys yr offeryn hwn. Byddwn yn ddiolchgar os gallwch gadarnhau natur a manylion yr ymgysylltiad hwn, a pha ddadansoddiad y mae Llywodraeth Cymru wedi'i wneud ar y 93 o ddarnau o gyfraith yr UE a ddargedwir sydd wedi'u cynnwys yn Atodlen 2 i'r Rheoliadau hyn.
4. Yn eich llythyr, rydych yn cadarnhau bod "ein hadolygiad hyd yma wedi canolbwyntio'n bennaf ar yr offerynnau mewn meysydd datganoledig". Pa fecanweithiau, os o gwbl, sy'n bodoli yn Llywodraeth Cymru i fonitro newidiadau i gyfraith yr UE a ddargedwir mewn meysydd a gedwir yn ôl a all effeithio ar Gymru, gan gynnwys ei heffaith mewn meysydd datganoledig hyd at fis Mehefin 2026?
5. Yn ei llythyr at y Pwyllgor Newid Hinsawdd, yr Amgylchedd a Seilwaith, dywedodd y Gweinidog Newid Hinsawdd "Yn fwy cyffredinol, nid oes gennym gynlluniau ar hyn o bryd i ddefnyddio unrhyw bwerau o dan Ddeddf REUL i ddirymu neu ddiwygio cyfraith gymhathedig." Datganodd y Gweinidog hefyd "n[a]d oes gan Lywodraeth Cymru unrhyw gynlluniau i ddefnyddio ei phwerau o dan y Ddeddf i ddirymu unrhyw ddarnau pellach o gyfraith gymhathedig, nac i gyflwyno deddfwriaeth newydd i ddisodli deddfwriaeth a gynhwysir yn Atodlen 1 y Ddeddf." Byddwn yn ddiolchgar pe gallech gadarnhau mai dyma'r sefyllfa ar draws holl adrannau Llywodraeth Cymru.
6. Mae'r ddwy eitem sy'n destun yr ohebiaeth uchod gan y Gweinidog Newid Hinsawdd yn dangos, ar gyfer un set o Rheoliadau (sy'n ymwneud â nwyon tŷ gwydr wedi'u fflworeiddio) y defnyddiwyd y fframwaith cyffredin perthnasol ond nid ar gyfer un arall (sy'n ymwneud â Rheoliadau Terfynau Uchaf Allyriadau Cenedlaethol).
  - i. A allwch chi esbonio'r rheswm dros hyn?



- ii. Rydych chi wedi dweud wrthym o'r blaen nad oedd modd i chi weld Atodlen 1 i Ddeddf Cyfraith yr UE a Ddargedwir (Dirymu a Diwygio) 2023 cyn iddi gael ei hychwanegu at y Bil yn ystod y cyfnodau diwygio yn Senedd y DU. A allwch gadarnhau a aeth y penderfyniad i gynnwys unrhyw ddarn o gyfraith yr UE a ddargedwir a restrir ar Atodlen 1 i Ddeddf Cyfraith yr UE a Ddargedwir (Dirymu a Diwygio) 2023 drwy'r fframwaith cyffredin cyfatebol?

